

tinana, o nga kupu korero, he kaha he marama. I a au e whakaputa nei i enei kupu mihi mo ratou, kei te hiki ake i roto i a au te aroha ki aua tini rangatira. Ko Taitoko, ko Te Kakakura, ko Tamahau ki te upoko o te ika; ko Tiakitai, ko Tomoana, ko Te Umairangi ki Heretaunga, me era atu rangatira maha o roto o nga rohe o nga tai e wha o te motu, nga mea o ratou i kite au.

Tena ra koutou nga uri, nga waihotanga iho o a ratou kupu whakamutunga, i mea ra ratou "I muri nei kia mau ki te Whakapono ki te Tumanako ki te Aroha." No koutou enei ra. Tena ra korikori kia kaha. Whaia aua mahi nui a o koutou matua i mahi ai mo te katoa.

Hapainga te whakapono me ona mahi  
Puritia te reo Maori, akona ki o tamariki  
Tautokona te Toa Takitini hei reo mo nga  
morehu o te iwi Maori  
Mahia nga mahi pai o te ahuwhehua  
Arabina nga tamariki ma te huarahi tika.

Ka roa pea enei korero, kaati ra me mutu iho. Kia ora tatou i roto i nga mahi tohu a te Ariki.

Na to koutou matua, tipuna hoki o te ao-tawhito.

Na Paratene Ngata.

## Wi Paraire Rangihuna

Na te 17 o nga ra o Hanuere ka moe a Wi Paraire i te moenga roa. Ko tona mate he huango he kahi. I maungia atu ki te Hohipera i Turanga a mate tonu atu ki reira.

I puta mai tenei tamaiti i roto i Te Aute Kareti, i Te Raukahikatea I tino mau pai i a ia nga tikanga pakeha tae noa ki te reo Ingarihi I tu ano ia hei mahi i Te Aute. I a ia e noho ana i te Rauka whakaritea ko ia hei kai-whakaako awhina i te tumuaki.

I whakapangia ia hei Rikona i te 22 o Tihema 1907, hei Piriti Akuhata 28, 1910, He tamaiti kaha ki te hapai i nga purei whutupaoro. I te tau 1908 ko ia tetahi o nga tamariki i tae atu ki Whakatu (Nelson) i roto i te ope o Te Aute Kareti ki te purei i nga tiimi o Nelson o Marlborough. Ko tana pariha tuatahi ko Nukutaurua.

I marena ia ki a Arihia Mataira o Nuhaka. I te wa i noho ai ia ki Te Rau ko ia tetahi o nga tangata hapai i te Pipiwharau me Te Kopara. Ka mutu tana mahi minita ka uru ia ki te Tari Whenua o te Kawanatanga i Turanga. Kaore i roa rawa te mutunga o tana mahi i reira ka mate nei. He tangata tenei i pirangitia e te pakeha e te Maori i runga i tona ngawari, ngahau, me tora mohio tonu.